



Sumvitg, 16-03-2026

Petiziun Golden Card era per la vischnaunca da Sumvitg

Preziau signur Wieland

Cun brev dils 06-01-2026 haveis Vus inoltrau ina petiziun rimnada a moda digitala. Per quei engaschi vulin nus engraziar a Vus e confirmein d'haver retschert Vies scriver. Tenor la constituziun communal (DC 010.000) art. 15 ha la suprastonza communal da tractar ina petziun sil pli tard enteifer 3 meins suenter la surdada. Schebein ina petiziun a moda digitala ademplescha las pretensiuns concernent las formalitads ni buca ei per la suprastonza communal el present cass buca stau relevant. Ella ha tractau Vossas damondas en sia seduta dils 09-03-2026 (protocol 05-2026). Bugen prendein sco suonda posiziun sin Vossas damondas.

Las vischnauncas sisum la Cadi cun las vischnauncas d'Ursera, Realp e Hospental han introduziu per miez digl onn 2025 la carta d'indigens "Golden Card" per lur convischinas e convischins e quei duront ina fasa da test da 3 onns. Suenter quels 3 onns vulan las vischnauncas e lur partenaris trer bilanza per decider da cuntinuar cun la Carta d'aur ni buc. Quei agir ha president communal Martin Cavegn da Tujetsch confirmau a nus persunal sco era enviars las medias.

La carta d'indigens duei promover il svilup dil liug denter auter ellas vischnauncas suramenziunadas. Igl ei ina cooperaziun denter las pendicularas dad Andermat-Sedrun che fuorman ina cuminonza da tariffa cun las pendicularas da Mustér sco era la viafier Matterhorn Gottard e las tschun vischnauncas suramenziunadas. Plinavon fuorman ils medems partenaris ina destinaziun turistica. Nossa vischnaunca separtizescha cun ina cunvegna da prestaziun alla destinaziun Surselva Turissem, pia in'otra che las vischnauncas vischinontas. Vitier vegn che la vischnaunca posseda oz strusch activitads per integrar en las prestaziuns dalla Carta d'aur. Pil mument ei quei sulettamein la loipa e per quella survegnan las vischnauncas da Trun e Sumvitg ina contribuziun ord la Carta d'aur.

A caschun dils workshops dalla strategia communal duront igl onn 2023 ei denter auter la tematica dallas tariffas per indigens tier las pendicularas vegnida discutada.

Las convischinas ed ils convischins da nossa vischnaunca profiteschan en neginas destinaziuns da skis d'ina purschida d'indigens. Igl ir cun skis ni aissa ei trasquei e risguardond igl equipment necessari in hobbi ch'ei oravontut per las famiglias fetg custeivels. La suprastanza communal ei perquei s'occupada da rudien cun questa tematica e ha fatg ponderaziuns co la vischnaunca savess sustener las famiglias. La suprastanza communal ei beinspert vegnida tier la conclusiun ch'igl ei ord vesta dalla sanadad opportun da sustener affons e giuvenils che fan sport. Plinavon eis ella era vegnida tier la conclusiun ch'in tal sustegn astga denton buca serestrenscher sil sport da skis. Ella ha perquei decidu da relaschar ina lescha che duei promover il sport tier affons e giuvenils cun conceder contribuziuns annualas vid abonnaments da far sport ni vid contribuziuns ad uniuns sportivas. Cun quella lescha sa aschia vegnir fatg prevenziun da sanadad ed ultra da quei vegnir susteniu nossas famiglias ed aschia augmentau l'attractivitat da nossa vischnaunca per famiglias. La radunonza communal dils 30-01-2024 ha giu approbau quella lescha e mess ella retroactiv sin l'entschatta digl onn 2024 en vigur.


Pigl onn 2024 ha la vischnaunca concediu ina summa da biabein frs. 16'000 vid abonnaments da sport e pil 2025 ha la vischnaunca concediu ina summa da biabein frs. 20'000. Risguardont ils 100 d'affons e giuvenils da nossa vischnaunca e la contribuziun fixada sin frs. 300 per affon e giuvenil savess la summa esser entuorn frs. 30'000. Ei semuossa che buca tuts nezegian la pusseivlada da retrer quella contribuziun ni ch'ei vegn buca cumprau in abonament.

La suprastanza communal ei pertscharta che nies product ei buca uguals sco la Carta d'aur. Denton savein nus aschia sustener buca mo convischinas e convischins che fan diever dallas purschidas sisum la Cadi mobein era a famiglias che fan diever da purschidas a Breil, Sursaissa ni auters logens en Surselva.

Nus sperein sin Vossa capientscha e stein per damondas ni era in discuors persunal bugen a Vossa disposiziun.

Cordials salids

Suprastanza communal Sumvitg



Copia a

- suprastanza communal